



Bosnia and Herzegovina
Federation of Bosnia and Herzegovina

**CANTON SARAJEVO
ASSEMBLY**

Na osnovu čl. 117. i 120. Poslovnika Skupštine Kantona Sarajevo ("Službene novine Kantona Sarajevo", broj: 41/12– Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22-Ispravka), Skupština Kantona Sarajevo na Drugoj hitnoj sjednici, održanoj dana 08.04.2024. godine, donijela je sljedeće

ZAKLJUČKE

1. Zadužuje se Ministarstvo unutrašnjih poslova Kantona Sarajevo i Uprava policije Ministarstva unutrašnjih poslova Kantona Sarajevo za vršenje pojačanih preventivnih i represivnih mjera koje se ogledaju u sljedećem:
 - povećan broj policijskih službenika na terenu kroz angažman patrolnih službi i saradnje sa lokalnom zajednicom, kao i da se osigura njihovo prisustvo u blizini škola, prometnih raskrsnica te drugih sigurnosno interesantnih objekata;
 - povećan broj mobilnih radara;
 - pojačan rad Jedinice interventne policije i Jedinice za bezbjednost saobraćaja na terenu;
 - pojačan rad vozilima "presretačima";
 - povećan broj patrola u periodu od 19 sati do 7 sati ujutro na najfrekventnijim raskrscima u gradu;
 - nastavak primjene Smjernica o poboljšanju sigurnosti u saobraćaju u Kantonu Sarajevo i implementaciji Akcionog plana za prevenciju krađe putničkih motornih vozila koji podrazumijeva i postavljanje video nadzora, te prevencija povreda u saobraćaju.
2. Komisija za sigurnost Skupštine Kantona Sarajevo je izrazila neupitnu i punu podršku Ministarstvu unutrašnjih poslova i Upravi policije, s obzirom na složenost sigurnosne problematike cijeni da je i dalje neophodno, u skladu sa Zaključcima Skupštine Kantona Sarajevo iz juna 2023. godine:
 - a) nastaviti multisektorske aktivnosti na borbi protiv maloljetničke delinkvencije i aktivnosti utvrđene Strategijom i Akcionim planom za sprječavanje i suzbijanje zloupotrebe opojnih droga u Kantonu Sarajevo (KS);
 - b) provoditi aktivnosti na borbi protiv saobraćajne delinkvencije kroz primjenu mjera i aktivnosti utvrđenih u Smjernicama za poboljšanje sigurnosti saobraćaja u KS;
 - c) provoditi Plan pojačanih aktivnosti policijskih službenika Sektora za policijsku podršku s ciljem smanjenja kriminaliteta i pronalaska predmeta koji potiču iz krivičnih djela (02/4-0-4-3-09/24 od 30.01.2024. godine), a koji se odnosi na pojačano prisustvo timova policijskih službenika, u večernjim i noćnim satima, na ulicama i drugim javnim prostorima u Kantonu Sarajevo;

- d) provoditi Plan postupanja policijskih službenika „Ulični trkač“ (02/2-6-03-3-683/23) koji se odnosi na smanjenje pojavnih oblika ugrožavanja javnog saobraćaja od tzv. „uličnih trkača“;
 - e) provoditi Plan postupanja policijskih službenika „Brzina“ (02/2-6-03-3-1747/23) koji se odnosi na prekoračenje dozvoljene brzine kretanja motornih vozila;
 - f) intenzivirati i po potrebi ažurirati postojeće planske aktivnosti koje se odnose na preveniranje i suzbijanje krivičnih djela i prekršaja s elementima nasilja;
 - g) nastaviti postojeće aktivnosti koje se odnose na planiranje i realizaciju operativno-taktičkih akcija koje se odnose na krivična djela neovlaštenog prometa opojnim drogama, nedozvoljenog držanja oružja ili eksplozivnih materija i razbojništva;
 - h) nastaviti procese nabavke neophodnih materijalno-tehničkih sredstava za efikasniji rad policijskih službenika.
3. Shodno stanju popune sastava policije, policijske sastave maksimalno angažovati u provođenju proaktivne preventivne djelatnosti kroz razgovore sa lokalnim stanovništvom i pojačanim prisustvom na kritičnim mjestima. Također, zadužuje se MUP Kantona Sarajevo da odmah prema Vladi Kantona Sarajevo uputi inicijativu za prijem novih, a prema pravilniku o sistematizaciji nedostajućih policajaca.
 4. Potrebno je prema Vladi Federacije BiH i Federalnom ministarstvu unutrašnjih poslova uputiti inicijativu za povećanje smještajnih kapaciteta u Policijskoj akademiji kako se ne bi dugo čekalo na pohađanje potrebnih kurseva i obuka, a što je uslov za prijem novih policajaca, kao i sagledati zakonske mogućnosti uspostave srednje škole unutrašnjih poslova na nivou Federacije BiH.
 5. Obavezuje se Uprava policije MUP-a Kantona Sarajevo da pokrene aktivnosti s ciljem uvođenja videonadzora javnih prostora na području Kantona Sarajevo, shodno sigurnosnim procjenama kojima raspolažu, kako bi se stepen sigurnosti građana podigao na viši nivo.
 6. Obavezuje se Uprava policije MUP-a Kantona Sarajevo da blagovremeno informiše javnost o svim sigurnosnim događajima, ne ugrožavajući operativni interes i elemente koji mogu kompromitovati dalje istražne aktivnosti, kako bi građani imali informaciju iz pravog izvora, a neodgovorni pojedinci ne bi imali mogućnost da poluinformacijama dezinformišu građane.
 7. Obavezuje se Uprava policije MUP-a Kantona Sarajevo da aktivno prati i preduzima potrebne aktivnosti, a koje se odnose na praćenje migrantske situacije na području Kantona Sarajevo iz svih sigurnosnih aspekata.
 8. Zadužuju se MUP Kantona Sarajevo i Uprava policije da u skladu sa postojećim Protokolom o međusobnoj saradnji i pružanju pomoći, redovno održavaju saradnju sa svim sigurnosnim subjektima relevantnim za sigurnost na području Kantona Sarajevo.
 9. Zadužuje se Ministarstvo pravde Kantona Sarajevo da provjeri zakonske mogućnosti vezano za uspostavu javnog registra kažnjenih lica, po osnovu višestrukih povratnika činjenja prekršaja iz oblasti saobraćaja, javnog reda i mira i registra stanodavaca i zakupaca u Kantonu Sarajevo.
 10. Zadužuje se Uprava policije MUP-a Kantona Sarajevo, da u narednom periodu pokrene aktivnosti i izvrši sistematske preglede svih policijskih službenika, te da u skladu sa zakonskim odredbama izvrši odabir institucija za obavljanje te aktivnosti.
 11. Zadužuje se Ministarstvo unutrašnjih poslova Kantona Sarajevo i Uprava policije Kantona Sarajevo, da izvrši sveobuhvatnu analizu dosadašnje primjene Zakona o unutrašnjim poslovima Kantona Sarajevo i Zakona o policijskim službenicima Kantona Sarajevo, kao i podzakonskih

propisa koji proizilaze iz navedenih zakona, te nakon provedene analize predloži izmjene i dopune predmetnih zakona, kao i druge uočene nedostatke u dosadašnjoj primjeni navedenih propisa, a sve u cilju što boljeg, efikasnijeg i funkcionalnijeg rada Uprave policije i Ministarstva unutrašnjih poslova Kantona Sarajevo.

12. Zadužuje se Uprava policije MUP-a Kantona Sarajevo da odmah inicira izmjene i dopune Zakona o osnovama bezbjednosti saobraćaja na putevima u BiH, Zakona o prekršajima Federacije BiH, te da inicira potpisivanje memoranduma o saradnji s Poreznom upravom Federacije BiH, s ciljem prinudne naplate neplaćenih kazni po osnovu prekršajnih naloga i oduzimanja vozila.
13. Zadužuje se Uprava policije MUP-a Kantona Sarajevo, da u saradnji sa Državnim sigurnosnim organom Ministarstva sigurnosti BiH, intenzivira aktivnosti na uspostavi sigurnosnog područja, a u skladu sa Zakonom o zaštiti tajnih podataka BiH.
14. Zadužuju se Vlada Kantona Sarajevo i resorno ministarstvo da pripreme izmjene Zakona o nabavljanju, držanju i nošenju oružja i municije ("Službene novine Kantona Sarajevo", broj: 1/18, 13/18 i 30/19), tako da se vrši izmjena člana 74. stav 1. Zakona, da glasi:

„član 74. (Krivična djela)

(1) Kaznom zatvora od tri godine do pet godina kaznit će se za krivično djelo:

a) ko bez odobrenja nabavi, drži ili nosi vatreno oružje kategorije B (čl. 10. i 20. ovog Zakona), izuzev pravnih lica kada nabavljaju oružje kategorije B na osnovu člana 28. stav (4) ovog Zakona,

b) ko proda vatreno oružje kategorije B pravnom licu, poduzetniku ili fizičkom licu koji nemaju odobrenje za nabavljanje te vrste oružja (čl. 28. stav (4) i 61. stav (1), tačka a) ovog Zakona), izuzev kada se vatreno oružje kategorije B prodaje pravnim licima na osnovu člana 28. stav (4) ovog Zakona,

c) ko drugom da pištolj ili revolver na poslugu (član 40. stav (1) ovog Zakona) ili ko da na poslugu lovačko oružje ili sportsko vatreno oružje licu koje za tu vrstu oružja nema oružni list (član 40. stav (2) ovog Zakona) i

(2) Za krivična djela iz stava (1) ovog člana obavezno se izriče i zaštitna mjera oduzimanja oružja.

(3) U izvršenju zaštitne mjere iz stava (2) ovog člana za krivično djelo iz stava (1) tač. b) i c) ovog člana oduzima se oružni list, odnosno odobrenje za držanje oružja.”

15. Inicirati izmjenu zakonskih okvira na nivou Federacije BiH, tačnije Zakona o zaštiti od nasilja u porodici, kao i Krivičnog zakona i dalje ostaje imperativ, kako bi svi u lancu zaštite, preveniranja i izricanja kazni u slučajevima porodičnog nasilja imali bolje alate i rezultate u borbi protiv ovih krivičnih djela.
16. U svrhu procjene rizika od nasilja i nasilja u porodici neophodno je unaprijediti institucionalnu koordinaciju međusobne razmjene podataka, iskustava i planova svih institucija i ustanova u sistemu.
17. Uzimajući u obzir da su u velikom broju počinioci nasilja i nasilja u porodici povratnici u kazneno djelo, neophodno je uvođenje obavezne kontrole i praćenja psiho-socijalnog tretmana počinioca nasilja.
18. S obzirom da je nasilje u porodici istovremeno i nasilje na maloljetnom djecom, nužno je osim izrečenih zaštitnih mjera direktno žrtvi nasilja, izdati zaštitu i njihovoj maloljetnoj djeci, na vremenski period koji se može smatrati rizičnim kako za žrtvu, tako i za dijete.

19. Pojačati kadrovsko i materijalno kapacitiranje Centra za socijalni rad, Porodičnog savjetovaništa u svrhu pojačanog terapeutsko-savjetodavnog rada i psiho-ekonomskog osnaživanja žrtava nasilja, te ponovno uvođenje grupa samopomoći gdje su ciljne skupine vršiooci nasilja.
20. Dodatno kapacitiranje stručnih timova u osnovnim i srednjim školama sa socijalnim radnicima, kako bi se ojačali i dodatno doprinijeli preventivnom djelovanju.
21. Potrebno je djelovanje i rezultate učiniti vidljivijim javnosti, kreirati i održavati medijski fokus i promovisati jasno precizirane sve korake koji žrtvi stoje na raspolaganju u svrhu njene zaštite i daljeg tretiranja kako bi se žrtve dodatno ohrabrile, prijavile nasilje te pomogle u njegovom daljem sprečavanju.
22. Predlaže se Upravi policije da u vezi sa postojećim sigurnosnim izazovima u Kantonu Sarajevo, Federaciji BiH i Bosni i Hercegovini, prilikom nabavke opreme/robe, a za koju postoje sigurnosne potrebe da se označe stepenom tajnosti, primjenjuju odredbe Zakona o javnim nabavkama ("Službeni glasnik Bosne i Hercegovine", br. 39/2014 i 59/2022) kojima se propisuje izuzeće u skladu sa čl. 10d., 10e. i 10f. Zakona, odnosno odredbe Zakona o zaštiti tajnih podataka ("Službeni glasnik BiH", broj 54/05, 12/09) i Pravilnika o industrijskoj sigurnosti ("Službeni glasnik BiH", broj 55/17).
23. Poziva se Kantonalno tužilaštvo Kantona Sarajevo da preispita politiku krivičnog gonjenja prema počiniocima krivičnih djela protiv života i tijela, zdravlja ljudi (krivična djela u vezi s opojnim drogama) te sigurnosti saobraćaja, posebno u pogledu sporazuma o prihvatanju krivnje, predlaganja kazni te zastarjevanja krivičnog gonjenja.
24. Poziva se Općinski sud Sarajevo i Kantonalni sud u Sarajevu, da u okviru svojih nadležnosti preispita kaznenu politiku i u kojoj mjeri je u skladu s odredbom Krivičnog zakona FBiH o svrsi kažnjavanja, u smislu generalne i specijalne prevencije kada su u pitanju krivična djela protiv života i tijela, zdravlja ljudi (krivična djela u vezi s opojnim drogama), te bezbjednosti saobraćaja i nelegalnog posjedovanja i trgovine oružjem.
25. Poziva se Visoko sudsko i tužilačko vijeće Bosne i Hercegovine (VSTV) za pojačani nadzor i kontrolu pravosudnih tijela u Kantonu Sarajevo u pogledu efektivnosti i efikasnosti radnji, mjera i odluka koje provode i donose.
26. Poziva se Ministarstvo unutrašnjih poslova i Uprava policije da odmah pokrenu izradu dugoročnog plana aktivnosti na sprječavanju i suzbijanju najtežih oblika krivičnih djela, a posebno krivičnih djela protiv života i tijela, zdravlja ljudi (krivična djela u vezi s opojnim drogama) te bezbjednosti saobraćaja, uz ojačavanje kapaciteta u Kantonu Sarajevu za analitičko praćenje ovih oblika kriminalnog ponašanja.
27. Predlaže se Vladi Kantona Sarajevo da razmotri prijedlog formiranja interresornog tima koji bi trebao da izvrši analizu, te dostavi prijedlog koji će obuhvatiti kratkoročne i dugoročne mjere u cilju poboljšanja sigurnosti svih građana u KS sa konkretnim prijedlozima za izmjene zakonskih regulativa.
Prijedlog članova stručnog tima bi bili predstavnici iz sljedećih institucija (uz mogućnost dodatnih članova ako se uoči potreba):
 - a) Ministarstvo unutrašnjih poslova,
 - b) Uprava policije MUP-a stručni kadar iz policijskih struktura KS i FMUP-a, policijske akademije i Fakulteta kriminalističkih nauka,
 - c) Tužilaštvo KS,

- d) Kantonalni sud u Sarajevu/Općinski sud u Sarajevu,
 - e) Zavod za bolesti ovisnosti KS,
 - f) Ministarstvo za odgoj i obrazovanje KS,
 - g) Ministarstvo za nauku, visoko obrazovanje i mlade u KS,
 - h) Ministarstvo saobraćaja KS,
 - i) Pravnog fakulteta, fakultet za saobraćaja i filozofskog fakulteta – psiholozi,
 - j) FMUP-a, stručni kadar iz policijske akademije.
28. Preispitati broj policijskih službenika u Kantonu Sarajevo prema važećem Pravilniku o unutrašnjoj organizaciji i sistematizaciji radnih mjesta MUP-a Kantona Sarajevo, te odrediti njihov optimalan broj u skladu sa potrebama i sigurnosnim izazovima, te sagledati stvarne potrebe kada su u pitanju materijalno-tehnička sredstva vezano za uspješan rad Kantonalne policije, naročito naglasak staviti na jačanje i kapacitiranja odjela za cyber kriminal, kao i vraćanje psihologa u policijske strukture i dostaviti informaciju na Skupštinu Kantona Sarajevo u što kraćem roku.
29. Uspostaviti sistem koji će omogućiti permanentno usavršavanje i osposobljavanje policijskih službenika kroz različite razmjene iskustva sa policijskih tijelima zemalja EU i šire putem specijaliziranih obuka, treninga, sticanja novih taktika, upoznavanje sa novim materijalno-tehničkim sredstvima kako policajaca tako i rukovodnog kadra, te osigurati potrebna finansijska sredstva za realizaciju navedenog.
30. Unutar Uprave policije formirati odjeljenje koje će se baviti operativnom analitikom i prevencijom krivičnih djela u Kantonu Sarajevo.
31. Zadužuje se Kolegij Skupštine Kantona Sarajevo, da na osnovu dostavljenih informacija iz segmenta sigurnosti, razmatra potrebe održavanja tematskih i hitnih sjednica Skupštine Kantona Sarajevo.
32. Zadužuju se Vlada Kantona Sarajevo, Ministarstvo pravde i uprave Kantona Sarajevo, Ministarstvo unutrašnjih poslova Kantona Sarajevo da pripreme izmjenu Krivičnog zakona Federacije BiH kojim će propisati kao krivično djelo objesnu vožnju u saobraćajnom prometu (obilježje i sankciju), te da upute inicijativu za izmjene zakona prema nadležnim organima.
33. Zadužuju se Vlada Kantona Sarajevo, Ministarstvo pravde i uprave Kantona Sarajevo, Ministarstvo unutrašnjih poslova Kantona Sarajevo da pripreme izmjene Zakona o prekršajima FBiH član 53. stav (2) te da upute inicijativu za izmjene zakona prema nadležnim organima. I to na način da se briše ograničenje za pokretanje prekršajnog postupka iz člana 53. stav (2), i propiše obavezan zahtjev za pokretanje prekršajnog postupka za prekršaje iz člana 234.a. Zakona o osnovama bezbjednosti saobraćaja na putevima u Bosni i Hercegovini, odnosno za prekršaje iz saobraćaja za koje je propisana novčana kazna veća od 300,00 KM.
- Zakon o prekršajima FBiH izmjena člana 105. stav (2) lišenje slobode zbog neplaćanja:
U članu 105. stav (2) riječi: „sud može odrediti lišenje slobode do 15 dana“, zamjenjuju se riječima: „sud može odrediti lišenje slobode do 90 dana“.
34. Zadužuju se Vlada Kantona Sarajevo, Ministarstvo pravde i uprave Kantona Sarajevo, da pripreme dopunu Zakona o izvršnom postupku Federacije BiH član 23. izvršna isprava, te da upute inicijativu za dopunu zakona prema nadležnim organima. I to na način da se izvrši dopuna člana 23. Zakona o izvršnom postupku FBiH - prekršajni nalog je izvršna isprava.

35. Prihvata se Informacija o dosadašnjim aktivnostima Ministarstva za odgoj i obrazovanje iz oblasti primarne i sekundarne prevencije neprihvatljivih oblika ponašanja, zaštite učenika i njihove dobrobiti kao i postupanja odgojno-obrazovnih ustanova u slučaju iznenadnih, kriznih situacija.
36. Zadužuje se Ministarstvo za odgoj i obrazovanje Kantona Sarajevo da kontinuirano ostvaruje saradnju sa odgojno-obrazovnim ustanovama i prati stanje sigurnosti, zaštite učenika, cjelokupne školske zajednice, kao i da nastavi pratiti potencijalne rizike koji mogu ugroziti sigurnost školskih zajednica i u skladu sa aktuelnim potrebama donosi određene mjere kao što su izmjene zakona i podzakonskih akata i inicira aktivnosti usmjerene na osiguranje najboljeg interesa učenika.
37. Osigurati nastavak multisektorskog (sektor obrazovanja, socijalne zaštite, zdravstva i sigurnosti) učešća u izradi planova brige i podrške za učenike čije se neprihvatljivo ponašanje ili rizik koji može ugroziti najbolji interes učenika prepozna, identifikuje u odgojno-obrazovnoj ustanovi.
38. Osigurati u što skorijem roku prijem stručnog kadra u službama socijalne zaštite (socijalni radnici, pedagozi i psiholozi) JU “Kantonalni centar za socijalni rad” i centrima za mentalno zdravlje (psiholozi) pri JU Dom zdravlja Kantona Sarajevo kako bi se moglo pravovremeno odgovoriti na sve situacije u kojima je ugrožen najbolji interes djeteta.
39. Radi smanjenja sigurnosnih rizika na najmanju mjeru nužno je osigurati da učenici redovno pohađaju nastavu u školama kako bi nastavnici i stručni saradnici na vrijeme mogli uočiti određene faktore rizika i reagovati na adekvatan način, osiguravajući im neophodnu odgojno-obrazovnu podršku i stručni tretman.
40. U cilju prevencije situacija u kojima može biti narušen najbolji interes djeteta nije prihvatljiva bilo kakva obustava nastavnog procesa koja podrazumijeva diskontinuitet rada profesionalaca jer direktno može doći do ugrožavanja najboljeg interesa učenika, školskih zajednica ali i društva u cjelini.
41. Skupština Kantona Sarajevo obavezuje Vladu Kantona Sarajevo da uputi zahtjev Vijeću ministara BiH sa ciljem formiranja Komisije za sprečavanje zloupotrebe opojnih droga radi formiranja liste zabranjenih droga.
42. Skupština Kantona Sarajevo obavezuje MUP KS i Policijsku upravu KS da upute inicijativu telecom operaterima koji djeluju u BiH sa ciljem obaveze identifikacije prilikom kupovine prepaid kartica radi sprečavanja zloupotrebe istih u svrhu učestalih dojava o postavljenim eksplozivnim napravama u školama i slično.
43. Skupština Kantona Sarajevo obavezuje Vladu KS da će koordinirati aktivnosti radi obezbjeđenja sistema za hitno obavještanje javnosti u slučaju nestanka djece. Radi se o sistemu ‘Pronađi me’ ili ‘Amber alert’.
44. Zadužuju se Ministarstvo unutrašnjih poslova Kantona Sarajevo i Uprava policije da poveća broj neuniformisanih policijskih službenika na ulicama, na manifestacijama, u ugostiteljskim objektima - posebno onima koji imaju duže radno vrijeme i u kojima se služi alkohol, u saobraćaju, u vozilima javnog gradskog prijevoza i na drugim mjestima, a sa ciljem bržeg represivnog djelovanja, ali i radi prevencije.

45. Zadužuje se Ministarstvo unutrašnjih poslova Kantona Sarajevo da u cilju preventivnog djelovanja i kasnog sprečavanja i blagovremenog otkrivanja potencijalnih prijetnji za sigurnost građana i javni red i mir, bez odlaganja pristupi uspostavi službe “policajac pozornik”.
46. Osigurati efikasno i proaktivno procesuiranje krivičnih djela koja utiču na sigurnosnu situaciju u Kantonu Sarajevo.
47. Sačiniti analizu sudske kaznene politike za period od 2021. do 2023. godine, prema vrsti krivičnog djela iz Zaključka Kolegija Skupštine Kantona Sarajevo broj 01-04-244/24 od 19.03.2024. godine, u okviru Krivičnog odjeljenja Općinskog suda u Sarajevu i Krivičnog odjeljenja Kantonalnog suda u Sarajevu i istu, sa prijedlogom mjera, dostaviti Vladi Kantona Sarajevo u roku od 30 dana.
48. Jačati saradnju sa svim relevantnim institucijama, kako bi se brže i efikasnije reagovalo na kriminalne aktivnosti i pružio sveobuhvatniji pristup sigurnosti građana. Doprinos sudija i tužilaca može biti i u radu multisektoralnih komisija i koordinacionih tijela, u okviru Kantona Sarajevo i Federacije BiH, koje imaju za cilj izmjene zakona i unapređenje mehanizama borbe protiv nasilja u porodici, vršnjačkog nasilja itd.
49. Nastaviti sa dobrom praksom specijalizacije sudija i tužilaca za rad na krivičnim djelima koja se vezuju za određene oblike kriminaliteta i osigurati kontinuitet u kvalitetnoj edukaciji.
50. Educirati javnost, posebno medije o pravima i obavezama, kao i o posljedicama krivičnih djela, kako bi se kroz jačanje povjerenja prema pravosuđu smanjio broj krivičnih djela i poboljšala opća sigurnost.

Broj: 01-04-14398-1/24
08.04.2024.godine
S A R A J E V O

PREDSJEDAVALA
SKUPŠTINE KANTONA SARAJEVO

Elvedin Okerić



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-044, Fax: + 387 (0) 33 562-210
Web: <http://skupstina.ks.gov.ba>
E-mail: skupstina@skupstina.ks.gov.ba